

# OSLOBODENJE

Ovjavljeno: 10.03.2022.

## **Odobren produžetak rada Blokova 4 i 5 u TE Tuzla i TE Kakanj / Snabdijevanje strujom i grijanjem ostaje sigurno**

**MIREN ALJIĆ**

Blokovi TE Tuzla i TE Kakanj trebali su biti zatvoreni do kraja 2023, ali im je produžen radni vijek zbog krize na tržištu

Zastupnici Predstavničkog doma Parlamenta Federacije BiH odobrili su, na prijedlog Vlade FBiH, produžetak rada blokova 4 i 5 u termoelektranama Tuzla i Kakanj. Na ovaj način je osigurano nesmetano snabdijevanje strujom i grijanje gradova koji su na tim blokovima. Vlada FBiH je ovu odluku donijela već ranije, a na samoj sjednici Parlamenta premijer FBiH Fadil Novalić je kazao da je ovo nužno zbog rasta cijena energenata u svijetu. Na zastupnike je apelovao i sam direktor EPBiH Admir Anđelića.

- Parlament FBiH je 30. decembra donio izmjenu Zakona o električnoj energiji i ograničio cijenu električne energije na 20 posto u odnosu na prethodnu godinu. U svjetlu krize koja je kulminirala ratom u Ukrajini, uz rast cijena energenata, mi smo predložili da se donese ova odluka kojom će se produžiti rad blokova 4 u TE Tuzla i 5 u TE Kakanj, čime ćemo omogućiti da domaći kupci imaju sigurno snabdijevanje u vrijeme ove krize, kazao je Anđelića.

Blok 4 u TE Tuzla i Blok 5 u TE Kakanj su krajem 2021. godine već prešli 90 posto fonda sati koji je odobrila Energetska zajednica, i njihov rad je bio planiran samo u 2022. i 2023. godini, odnosno do 31. decembra 2023, s tim da su trebali proizvoditi ograničene količine električne energije.

Kako je ranije saopšteno iz EPBiH, produženjem rada blokova 4 u TE Tuzla i 5 u TE Kakanj Elektroprivredi BiH će biti omogućen nastavak proizvodnje iz ovih postrojenja i obezbjeđenje dovoljnih količina električne energije za zadovoljenje potreba kupaca, očuvanje stabilnosti elektroenergetskog sistema BiH i energetske neovisnosti.

- Uz visoku pogonsku spremnost raspoloživih kapaciteta i produženjem rada blokova 4 i 5 u termoelektranama, Elektroprivreda BiH biće u mogućnosti da vlastitim kapacitetima odgovori potrebama privrede i građana za električnom energijom i doprinese ublažavanju posljedica koje će neminovno nastupiti u slučaju smanjenja dotoka gasa, saopšteno je iz EPBiH.

# OSLOBODENJE

Ovjavljeno:25.03.2022.

## **U nedjelju ujutro počinje ljetno računanje vremena**

Mijenja se i vrijeme više i niže tarife za obračun utroška struje

U nedjelju 27. marta u 2.00 sata ujutro počinje ljetno računanje vremena. U trenutku prelaska na ljetno računanje vremena kazaljke na satovima treba pomjeriti za jedan sat naprijed, odnosno umjesto 2.00 biće 3.00 sata.

Prelaskom na ljetno računanje vremena, u nedjelju, 27. marta ove godine, nastupiće i promjene u primjeni viših i nižih dnevnih tarifnih stavova za kupce koje električnom energijom snabdijeva JP Elektroprivreda BiH (EPBiH).

Za domaćinstva koja posjeduju dvotarifna brojila, niži dnevni tarifni stavovi (tzv. jeftinija električna energija) primjenjivat će se radnim danima i subotom u intervalima od 14.00 do 17.00 i od 23.00 do 08.00 sati, a nedjeljom cijeli dan.

Za sve ostale kupce JP Elektroprivreda BiH, niži dnevni tarifni stavovi primjenjivat će se radnim danima u intervalu od 23.00 do 08.00 sati, a subotom i nedjeljom cijeli dan, saopćeno je iz Službe za komunikacije EPBiH.